

**1407-V-5, Toledo.— Juan II al Concejo confirmando los privilegios y franquicias que trajo a la ciudad Lope Ruiz de Dávalos. (A.M.M. Cart. Real 1391-1412, fol. 25v.)**

Publicada por PASCUAL MARTÍNEZ, L. en La Cancillería Real Castellana durante la regencia de Don Fernando de Antequera. Miscelánea Medieval Murciana 1984. V.XI pág. 177-136.

Don Juan por la graçia de Dios rey de Castilla, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Vizcaya e de Molina.

Por fazer bien merçed a vos el çonçejo, e cavalleros, e escuderos, e omes buenos de la noble çibdat de Murçia, confirmo vos todos los priverlegios, e cartas, e alvalas, e franquizias, e merçedes, e libertades que dezides que avedes de los reyes onde yo vengo, confirmados del rey don Juan mi avelo, del rey mi padre, e mi señor, que Dios perdone. E mando e tengo por bien que vos valan e sean guardados agora e de aqui a delante segund vos fueron guardados en tienpo de los dichos señores reyes mi avuelo e mi padre fasta aqui.

E mando, e defiendo, que ninguno ni algunos non vos vayan ni pasen, ni consientan yr ni pasar contra los dichos priverlegios, e cartas, e alvalas, e franquizias, e merçedes, e libertades, ni contra parte dellos por vos quebrantar solas penas en ellos contenidos, e por esta mi carta o por su traslado signado de escrivano publico mando sola dicha pena a los alcalles, e alguaziles de la mi corte e de la dicha çibdat de Murçia e de todas las çibdades e villas e lugares de mis reynos e señorios que vos guarden e fagan guardar los dichos priverlegios, e cartas, e alvalas, e franquizias, e merçedes, e libertades, segund vos fueron guardadas en tienpo de los dichos señores reyes mi avuelo e mi padre fasta aqui, como dicho es, e sobre esto mando al mi çançeller e notarios que vos den e libren e sellen mis cartas e priverlegios que les vos cunplieredes en esta razon porque vos sean guardados los dichos priverlegios e cartas, e alvalas, e franquizias, e merçedes, e libertades en la manera que dicha es, e mando sola dicha pena a qualquier escrivano publico que para esto fuere llamado que de ende al que vos la mostrare testimonio signado con su signo porque yo sepa en como conplides mi mandado.

Dada en la çibdat de Toledo, çinco dias de Mayo año del nascimiento del nuestro Salvador Ihesucristo de mill e quatroçientos e siete años. Yo Pero Alfonso la fiz escribir por mandado del señor Infante, tutor de nuestro señor el rey e regidor de sus reynos. Yo el Infante. E en las espaldas de la dicha carta ay escritos estos nonbres que se siguen: Yo el condestable. Pero Afan. Alfonso.

